

ԵՐԱԶՐ ԻՄ ԿՅԱՆՔՈՒՄ

Չեմ սխալվել, եթե ասեմ իմ կյանքում մի որևէ դեպք չի պատահած, որ առաջուց նախազգացած կամ նախատեսած չլինեմ: Նախազգացած ու նախատեսած էլ որ ասում եմ, ասում եմ ոչ միայն արթուն ժամանակ, այլև քնած ժամանակ, երագում, այլաբանորեն, պատկերներով, խորհրդանշաններով:

Բայց մենք տակավին ենք կոշտ ու կոպիտ, էնքան ենք անկատարյալ, որ լավ չենք հասկանում մեր նախազգացումները, մեր նախատեսություններն ու երագները: Նրանցից քչերն են մնում մեր մտքում և մնացածներից էլ հազարից մեկն ենք հասկանում, էն էլ մոտավորապես:

Սովորաբար արհամարհում են էս պարզ ու իմաստուն երևույթները և ծիծաղում են սոցիտորեն: Համարում են սուտ ու անկարելի:

Այնինչ էս ամենը շատ պարզ ու հասարակ երևույթներ էն էնքան պարզ ու հասարակ, ինչպես աչքով տեսնելն ու ականջով լսելը: [Եվ ինչպես աչքով տեսնում ենք] Եվ հենց աչքով տեսնել էլ որ տեսնում ենք, հո միշտ չենք նկատում, որովհետև տեսնել ու նկատել միևնույն բանը չի, ինչպես որ լսել ու հասկանալ միևնույն բանը չի, և էդ պատճառով էլ շատ բան ենք լսում, բայց քիչ ենք հասկանում:

Հաճախ մեր աչքերը նման են պարզ լուսամուտի. ետևը մարդ չկա, տեսնողը չկա կամ թե չէ կա, երբեմն էլ կա՝ թմրած է, աչքը վրեն չի, կամ ուղղակի քնած է և եթե կուզեք՝ ամենից ավելի հաճախ կույր է:

Երազը էնքան վառ ու կենդանի է եղել ինձ համար, որ այժմ երբ ետ եմ նայում իմ անցած կյանքին, երագն ու իրականությունը էնքան ուժեղ են իրար հյուսված, որ [առանց] մեկը մյուսից ես չեմ կարող ջոկել: Եվ էնքան իմաստուն շքեղ ու թանկ երագներ եմ ունեցել, որ ամեն մինը ինձ համար մի գեղեցիկ կյանք արժե:

Իմ հերն ու մերն էլ նախազգացումի, պայծառատեսության և երագի զարմանալի ընդունակություն ունեին: Ամեն մեկն ուներ իր փորձած երագները, ինչպես ունեն շատ մարդիկ: Միշտ առավոտները <...>հերս մի հին երագահան ուներ: Թե նրանով, թե իր ունեցած փորձով երագներ էր մեկնում: Եվ միշտ առավոտները էս կամ էն գյուղացին, կին թե տղամարդ, կգային՝ տերտեր ջան. էս գիշեր մի էս տեսակ երագ եմ տեսել, մի երագահանիդ մտիկ արա, տես ինչ ա ասում:

Իսկ մերս մինչև օրս էլ ինձ զարմացնում է իր նախազգացումներով, իր պայծառատեսությամբ ու իր երազներով: